

Aqutsisut 2021-imi ukiumoortumik naatsorsuutitut nalunaarussiaat

Suleriaasissaq ulluinnarnilu aqutsisut

2021-imi Siunnersuisoqatigiinni ulluinnarni aqutsisut ilaasortallu taarseraapput. Siunnersuisoqatigiinni ilaasortat aalajangersimasut - ilaatigut illersuisoqarfiit saniatigut, Siunnersuisoqatigiit ilisimasanik immersortuarneqarnissaat qulakkeerniarlugu, Siunnersuisoqatigiinni ilaasortat allat akornanni ukiut allortarlugit taarseraattoqartarpoq. Taamaalillutik 2021-imi siunnersuisoqatigiinni ilaasortat nutaat tallimat tikilluaqquneqarput ilaasortaajunnaartullu tallimat suliaat pillugit qutsavigineqarlutik.

2021-imi novembari qaammat, Inuit Pisinnaatitaaffii pillugit Siunnersuisoqatigiit inissitserlutik ataatsimiinnerminni siulittaasussamik, taassuma tullissaanik ulluinnarnilu aqutsisuulersussanut taakkununga pingatsiuttussamik toqqaapput. Allatseqarfimmi suliasanik ingerlatsinissamik pissusissamisoortumillu aalajangiisinaanissamik qulakkeerinissaq, ulluinnarni aqutsisut suliasaraat.

Atorfininnermi atugassarititaasut pitsaanngitsut

Siunnersuisoqatigiit allatseqarfianni aalaakkaanngitsumik sulisoqarneq patsisaalluni ulluinnarni aqutsisut 2021-tamakkerlugu allaffissornikkut ingerlatsinermi annertuunik suliasaqarsimapput. Ulluinnarni aqutsisut isumaat ersarisoq naapertorlugu, Siunnersuisoqatigiit allatseqarfiannik ingerlatsinermut aningaasassaqaannginnerup- tamatumalu nassatarisaanik allatseqarfimmi pisortatut atorfininnermi atugassarititaasut pitsaannginnerisa- allatseqarfimmi pisortamik piginnaaneqarluartumik pissarsiarneq aalaakkaasumillu sulisoqarniarneq ajornakuuulersippaat. Allatseqarfimmi pisortap ullumikkut persiarfissaasut tunngavigalugit allaffissornikkut annertuallaanik suliasaqarnermi saniatigut, inuit pisinnaatitaaffii pillugit sulianut tunngatillugu ilinniagaqassutsikkut ilisimaarinninnissaa naatsorsuutigineqarpoq.

Atavaaneersunik siunnersorteqarneq

Siunnersuisoqatigiinni sulineq allatseqarfimiillu ikiorserneqarneq, aningaasatigut, inissatigut nukissatigullu amigaaqarnermik suli sunnerneqarpoq, suliallu ingerlanneqartut Siunnersuisoqatigiinni ilaasortat, ulluinnarni aqutsisut siulittaasullu sunngiffiminni namminneq piumassutsiminnik iliuuseqarnermik tunniussinnaasaat tamakkiisumik apeqqutaallutik. Taamaammat ulluinnarni aqutsisut siunnersortinik allatseqarfimmi suliasanik pisariaqarnerpaanik isumaginnittussanik pissarsiornikkut, suliasat inatsisitigut piumasaqaataasut suliariniarsaraat. Allatseqarfimmi pisortatut atorfeqartitsinermi 2021-imi aningaasarsiaasatut missingersuutaasut, siunnersortinut allatseqarfimmilu pisortatut atorfeqartitsisarnerni sipporneqaanngillat. Taamaalilluni allatseqarfiup aalajangersimasumik atorfilinnik sulisoqaannginnera Siunnersuisoqatigiit sulinerannut, kiisalu siunnersuisoqatigiinnut ikiunnerup annertussusaanut pitsaassusaanullu sunniuteqarpoq.

2021-imi Aningaasanut inatsimmi aningaasaliissutinut ilassutissanik qinnuteqarneq

2021-imi aningaasartuutissatut missingersuutit aningaasaliissutinullu ilassutissatut qinnuteqaat tunngavilersugaq, 2020-imi apriliip ulluisa 14-ianni Siunnersuisoqatigiit allatseqarfiannit Naalakkersuisunut nassiunneqarpoq. Aningaasaliissutinut ilassutissatut qinnuteqaat akineqanngisaannarpoq. 2021-imut Aningaasanut Inatsissatut siunnersuutip saqqummiunneqarnerani, qinnuteqaatip akuerineqarsimanginnera siunnersuisoqatigiit paasivaat.

Siunnersuisoqatigiit 2021-imi apriliip ulluisa 15-ianni aningaasaliissutinut ilassutissatut 3.220.000 koruuninik qinnuteqaqqippit, qinnuteqaat 2022-imiit 2.400.000 koruuninik aningaasaliissuteqarnikkut tamakkiinngikkaluamik akuersissutaavoq. Tamatuma allatseqarfiup ingerlanneqarnissaata minnerpaaffissaminiinnissaa qulakkeerpaa, Siunnersuisoqatigiilli suliasaat inatsimmit aalajangersaavigisat aningaasaliiffiginagit. Taamaalilluni aningaasaliiffiqineqannginneq tunngavigalugu suliasanik iliuusissanillu pingaarnersiulluni tulleriarisariaqarnikkut unammilligassaqartuarnissaa naatsorsuutigisariaqassaaq.

Suliniut nunatsinni inuit pisinnaatitaaffiisa ilisimaneqarnerulernissaannik siuarsaermik siunertaqartoq, Inuit Pisinnaatitaaffii pillugit Instituttimit, Ilisimatusarfimmit nunatsinnilu Inuit Pisinnaatitaaffii pillugit Siunnersuisoqatigiinniit 2021-imi septembari qaammat aallartinneqarpoq. Nunatsinni inuit pisinnaatitaaffii pillugit ilisimasanik nukittorsaanissaq attassinnarnissarluni suliniut siunertaavoq, Siunnersuisoqatigiit aningaasalersorneqarnerani taamaaliornissamut periarfissaqanngimmat, Altantikup Avannaamiuinit Aningaasaliissutitigut aningaasalersugaavoq. Suliniut kalaallisut danskisullu inuit pisinnaatitaaffii pillugit paasissutissat nutartikkat pissarsiarineqarsinnaasullu inerisarneqarlutillu suliarineqarput.

2021-imi aningaasartuutissatut missingersuutini allannguutit

Ukiunut aningaasaliissutaasut 915.000 koruunit, arlaleriarluni sipaarniuteqartaraluarluni- ilaatigut allatseqarfimmi allaffissornikkut atortorissaarutinik annikillisaanikkut, sulisukillisaanikkut kiisalu Siunnersuisoqatigiinni ilaasortat angalanissaannut akissaqannginneq pissutigalugu Siunnersuisoqatigiit qarasaasiakkut ataatsimiittarnerisigut, naammattusaariniarnarsimaqaaq.

Siunnersuisoqatigiit inissitserlutik ataatsimiinneranni, ilaasortanngorlaat, ileqqut malillugit Siunnersuisoqatigiinni suliat pillugit ilitsersorneqarnissaannut aningaasartuutissanut tunngatillugu, aningaasaliissutinut ilassutissaannik pisariaqartitsineq paasineqarpoq. 176.000 koruunit qinnuteqaatigineqartut Meeqqanut, Inuusuttunut Ilaqutariinnullu Naalakkersuisoqarfimmit akuersissutaapput. Tamatuma kingunerisaanik amigartoorutaalersoq ukiumi ingerlatsivimmi tulluuttumi iluarsiissuteqarfigineqassaaq.

Aningaasaatit 2022-imi iluarsiissuteqarfigineqarnissaat naatsorsuutigineqarpoq.

Siunnersuisoqatigiit allatseqarfiat illersorneqarsinnaasumik isumagineqarsinnaanngilaq

Ulluinnarni aqutsisut isumaat ersarisoq naapertorlugu Siunnersuisoqatigiit allatseqarfiannik ingerlatsinermut Siunnersuisoqatigiillu sulinerminni ikiorserneqarnissaannut, 2021-imut Aningaasanut Inatsit naapertorlugu 2020-imi, 2021-imi ukiunilu missingersuusiorfusuni tulluuttuni tamani aningaasaliissutinut 915.000 koruuninut naammattumik isumagineqarsinnaanngilaq.

Ulluinnarni aqutsisut isumaat ersarisoq naapertorlugu Siunnersuisoqatigiinni sulineq annertuumik ilungersortitaavoq inatsimmullu tunngatillugu naammattumik naammassineqarsinnaanngittuarsinnarluni.



Inuit Pisinnaatitaaffii pillugit Siunnersuisoqatigiit
Grønlands Råd for Menneskerettigheder

Siunnersuisoqatigiinni sulineq nammineq piumassutsimik tunngaveqarpoq taamaammallu iliuuserisinnaasanut tunngatillugu killeqarluni. Tamatuma saniatigut allatseqarfimmit ilinniagaqassutsikkut ikiorserneqarsinnaannginneq aningaasaliisnaannginnerlu pissutigalugit Siunnersuisoqatigiit pilersaaruterpassuinik pingaarnersiulluni tullerijaareqqissaarnissaq pisariaqarluinnarpoq.

Allatseqarfiup inuttalerniarneranut tunngatillugu unammilligassat tunngavigalugit, aningaasaliissutit inissanut pissusissamisoortunut naammangimmata, namminerisamik allaffeqarnissamik pisariaqartitsineq salliunneqanngilaq. Allatseqarfik sulisoqalerpat maanna angissusaa 9,7 m² naammagunnaarluinnassamat, ininut/atortorissaarutinut akissarsianullu aningaasartuutit qaffariangaatsiarnissaat naatsorsuutigisariaqassaaq.



Qivioq Løvstrøm

Kalaallit Nunaanni Inuit Pisinnaatitaaffii pillugit Siunnersuisoqatigiinni siulittasoq